

յոյսեր տուաւ, թէ մեր տիրապետութիւնը կը հաստատուի :

« 3 Յունուարի . Գ . Պօտեօմէին իշխանի պատուէրով ես եւ Յ . Լ . Լազարեւը նրա մօտ գնացինք : Շատ խնդրեցինք մեր ազգի եւ Հայաստանի աղատութեան մասին : Նա ինքն երկար հարցումներ արաւ մեր ազգի, Հայրապետական աթոռի եւ կաթողիկոսի դրութեան մասին : Մենք թախանձանօք ազաչեցինք նրան վերականգնել Մեծ Հայաստանում , այն է Երեւանում , մեր տիրապետութիւնը : Նա պատասխանեց , թէ այդ հնարաւոր դործ է , բայց թէ դրա համար անհրաժեշտ է , որ Հայրապետն ու տեղական տանուտէրերից ոմանք խնդիր տան իրենց աղատելու մասին , որպէսզի օգնութեան հասնելու առիթ լինի » :

Նոյն թուի Յունուարի 10-ին Արղութեանը Սովորովին ներկայացրեց հետեւեալ յուշագիրը , որը բերում ենք Լէօի թարգմանութեամբ , բայց որոշ լրացումներով եւ փոփոխութիւններով 1) :

« Հայաստանը մի քանի դար է , ինչ զրկուել է իր թագաւորից եւ առանձին կառավարութիւնից : Շատ տեղերի տիրել են թուրքերը եւ պարսիկները , իսկ մի փոքրիկ մասը , այսինքն՝ Ղարաբաղը , մինչեւ այժմ էլ մնում է անկախ : Բայց եթէ ազգից մի գլխաւոր դուրս գայ , շատ հեշտ միջոցով Հայաստանը կարող է նորից վերականգնել եւ կարճ ժամանակի ընթացքում տեղի կ'ունենայ ժողովրդի մի ոչ փոքր հոսանք դէպի Հայաստան :

« Բնական ամուր տեղերը բաւական լաւ միջոց կարող են դառնալ ինքնապաշտպանութեան համար . հողի յատկութիւնը եւ կլիման , առանց որեւէ պակասութեան , կարող են տալ բոլոր հարկաւոր նիւթերը . նոյնիսկ սեփական վառօդ , երկաթ եւ կապար կարող են ունենալ :

« Ղարաբաղի մելիքները թէեւ ոչ ոքից կասում չունեն , բայց իրենց անմիաբանութեամբ զօրեղացրել են մահմեդական Փանահ խանին եւ պատճառ են դարձել իրենց ուժերի քայքայման : Բացի դրանից , այդ իշխանների տգիտու-

թիւնը բոլորովին անպէտք է դարձնում նրանց՝ թէ՛ իրենց եւ թէ՛ ամբողջ ազգի համար :

« Միւս տեղերի հայերը , լինելով պարսիկ խաների իշխանութեան տակ , հարստահարուած են եւ նրանց մեծ մասը փախել են թուրքական երկրները — Փոքր Հայք , Վան , Կարս , Կարին եւ ուրիշ տեղեր :

« Եթէ ժողովրդի ընտրութեամբ կամ բարձրագոյն հաճութեամբ ազգից մի գլխաւոր դուրս գար , առաջին անգամի համար բաւական կը լինէր , որ նա կարողանար հաստատուել Գերբենդում եւ նրան օգնութիւն տրուէր տիրելու Շամախուն եւ Գանձակին : Այն ժամանակ Ղարաբաղից ու Սղնախից 2) , որոնք անկասկած կը միանան , բաւականաչափ զօրք հանելով , կարող է նաեւ Երեւանը եւ միւս քաղաքները դրաւել : Դրա համար հարկաւոր է երկու կամ երեք հազարից ոչ աւելի զօրք երկու տարուան ընթացքում , մինչեւ որ գլխաւորը կարողանայ զբաւել Երեւանը : Երեւանը զբաւելուց յետոյ՝ հայկական դաւաճների եկամուտներով , առանց մի պակասութիւն զգալու , կարելի է պահել զօրքերի մի մեծ բազմութիւն :

« Բայց հայոց պետը սկզբում պէտք է ունենայ մի քիչ թնդանօթածիլք եւ հետեւակ զօրք , որպէսզի կարողանայ պաշտպանուել եւ ապահով լինել , մինչեւ որ ազգային զօրքը կը սովորէ զինուորական անհրաժեշտ գիտելիքները եւ այնուհետեւ նա ինքը կարող կը լինի ամբայնել իր սահմանները եւ պաշտպանուել թիւրքիայի ու Պարսկաստանի յարձակումներից :

« Այսպիսի մի ձեռնարկութիւն կարող է կայսերական մի խօսքով եւ ամենահեշտ միջոցով , առանց ամենափոքր կասկածի անգամ , գլուխ գալ եւ նրա (Եկատերինայի) հովանաւորութեամբ մի կարճ միջոցում ո՛չ միայն կ'ամբապնդուի ի յաւիտենական փառս Ռուսաստանի , այլ եւ ապաղայում կարող է ծառայել թիւրքիան եւ Պարսկաստանը ճնշելու համար , որովհետեւ երբ հայ ժողովուրդը կը համախմբուի իր կառավարութեան իշխանութեան տակ եւ մի քիչ էլ կ'ընդարձակէ իր սահմանները , այն ժամանակ կը ստանայ աւելի մեծ

1) «Գործեր» II, էր. 70. Լէօ, «Հայկ. Հարցի Վաւերագրեր», էր. 20:

2) Այդպէս կոչում է Շամախու շրջանը :